

Á MESA DO PARLAMENTO

O Grupo Parlamentar de En Marea, a iniciativa da súa Deputada **Paula Vázquez Veroa** e do seu Deputado **Luís Villares Naveira**, ao abeiro do establecido no artigo 152 do Regulamento desta Cámara, presentan a seguinte **Pregunta** para a súa contestación na Comisión 5ª

EXPOSICIÓN DE MOTIVOS

O Concello de Monforte precisa máis prazas de escolas infantís de 0 a 3 anos, pois anualmente a demanda supera á oferta existente.

Actualmente, o municipio conta cunha escola de titularidade municipal, con 41 prazas, a escola “Parruliños”, con 43 prazas autorizadas, e a escola que fora de Caixa Galicia, con 35 prazas, 10 das cales son concertadas por parte da Xunta, nun lote que saíu adxudicado en febreiro de 2018, e con 14 en lista de agarda.

Monforte de Lemos non conta cunha escola pública de ensino infantil da rede autonómica.

Recentemente, a Escola Infantil San Vicente de Paúl (antiga Caixa Galicia) vén de anunciar que ten graves dificultades económicas para continuar co servizo, o que poría en perigo tanto as prazas de gardería como seis postos de traballo.

En total, hai 119 prazas autorizadas de gardería en Monforte, co cal, de pechar a escola citada, perderíase máis do 30% das mesmas.

Antes das eleccións municipais de 2015, o Concello de Monforte comprometérase en camiñar cara unha unificación de dito centro coa escola infantil municipal, mais non hai constancia de avances neste sentido; avances que deberan comezar por facer un informe sobre as posibilidades, ou non, de unificación dos centros.

Hai que ter en conta que hai liñas de financiamento para equipamento, mantemento e infraestruturas para escolas infantís por parte da Xunta; iso si, son fondos claramente insuficientes.

A Xunta afirma, nunha resposta ao Grupo Parlamentar de En Marea, que no curso 2016/2017 se concederon 24 bonos Concilia a familias de Monforte de Lemos. O bono concilia é unha axuda que ten por “obxecto contribuír a sufragar o custo dunha praza nunha escola escola privada a aquelas que non a obtiveran nun centro con financiamento público ou que residan en concellos onde non hai un recurso deste tipo sostido con fondos públicos”, pero de pouco vale en Monforte se tampouco hai oferta privada suficiente. De feito, todos os anos hai lista de agarda tanto na gardería municipal (ata 40 nenos e nenas en lista de agarda) como nas privadas.

A Xunta afirma que “todas as familias solicitantes dunha praza para a atención de nenos e nenas de entre cero e tres anos a obterán” e, en sede parlamentaria, o ex Conselleiro de Política Social afirmou que dotará de escolas infantís a aqueles concellos que o soliciten (comparecencia do 6 de xuño de 2017).

A provincia de Lugo ten a rateo máis baixa de Galiza en número de prazas de escolas infantís. Para En Marea, contar con recursos públicos de conciliación en todo o territorio galego debe ser unha prioridade do Goberno dun País socialmente avanzado, máis no caso dunha nación en recesión demográfica, especialmente nas zonas máis avellentadas, como a comarca de Lemos. Desgraciadamente, a Proposición Non de Lei que o Grupo Parlamentar de En Marea presentou no Parlamento en decembro de 2017 para aumentar as prazas en escolas infantís na provincia de Lugo foi rexeitada polo PP.

Polo exposto, o Grupo Parlamentar de En Marea formula a seguinte Pregunta para a súa resposta oral en Comisión:

1. Que vai facer a Xunta ante as dificultades de continuidade da escola infantil “Gardería San Vicente de Paúl”?
2. Ten previsto a Xunta buscar unha solución inmediata de acordo co Concello de Monforte, co propio centro, co persoal e coas nais e pais do alumnado para facer viable a continuidade do servizo o vindeiro curso?
3. Non considera a Xunta que Monforte, como capital da comarca de Lemos, debe contar cun centro da rede Galiña Azul?

4. Que medidas vai tomar a Xunta para aumentar o número de prazas en escolas infantís na comarca de Lemos?

5. Ten previsto a Xunta aumentar as prazas concertadas nas escolas infantís privadas de Monforte?

6. Como vai garantir a Xunta a promesa de lista de agarda cero en escolas infantís se non hai prazas suficientes para acoller a demanda existente?

7. Solicitou formalmente o Concello de Monforte á Xunta unha escola infantil pública para o municipio?

8. Vai a Xunta impulsar a creación dunha escola infantil pública de 0 a 3 anos en Monforte?